

Riječ Redakcije

Cijenjeni čitatelji !

Na stranicama jedanaestog broja časopisa *Historijska traganja* priredili smo vam četiri vrlo zanimljiva rada.

Prvi je skraćena verzija magistarskog rada Aide Ličina Ramić, odbranjenog 4. 2. 2013. godine na Filozofskom fakultetu Univerziteta u Sarajevu, u kojem je autorica rekonstruirala proces osnivanja, organizacijsku strukturu, finansiranje, zatim članstvo, politiku stipendiranja i mnoge druge aspekte djelovanja Titovog fonda za stipendiranje mladih radnika i radničke djece u Socijalističkoj Republici Bosni i Hercegovini tijekom razdoblja od 1974. do 1986. godine.

Na osnovu dosada neobjavljene građe iz Državnog arhiva u Dubrovniku, Marija Kocić je analizirala stav mletačke oligarhije i javnosti prema opsadi Beča kao i prve reakcije nakon povlačenja Osmanlija kada je donesena odluka o priključenju Venecije Svetoj ligi i ulasku u sukob s Portom poznatim kao Morejski rat (1684-1699).

Treći rad je Adnana Jahića o odnosu bosanskohercegovačkih vjerskih službenika – uleme – prema nacionalnom pitanju u Kraljevini Jugoslaviji, u kojem iznosi mišljenje da ulema u međuratnom periodu nije imala konzistentno gledište o ovom pitanju, čime je presudno pomogla očuvanju i jačanju muslimanske/bošnjačke nacionalne posebnosti.

Na razdoblje između dva svjetska rata odnosi se i rad Enesa S. Omerovića. Autor je obradio jedan od aspekata u međustranačkom političkom životu analizirajući verbalne i fizičke sukobe aktivista i pristalica pojedinih političkih stranaka na primjeru Bosne i Hercegovine u okviru izbora za Ustavotvornu skupštinu Kraljevstva Srba, Hrvata i Slovenaca od 28. 11. 1920. godine.

Nakon ovih kratkih napomena o sadržaju časopisa pozivamo vas na suradnju.

Redakcija